



**JUDICIAL SYSTEM MONITORING PROGRAMME**  
**PROGRAMA MONITORIZASAUN BA SISTEMA JUDISIÁRIU**

***Komunikadu Imprensa***  
***02 Juñu 2014***

**Eskola Sekundária Públiku Palaban Oecusse primeiraves hetan treinamentu kona-ba asesu ba justisa**

Iha 28 Maiu 2014, Judicial System Monitoring Programme (JSMP), liuhosi Unidade Peskizador Jurídiku no Relasaun Públiku, hala'o treinamentu ba estudante Sekundária Públiku Palaban, iha Distritu Oe-cusse.

Atividade ne'e ho objetivu atu kontinua fahe inforamsaun legál ba estudante sira, no atu haklean liu tan estudante sira nia koñesimentu iha setór justisa nian. Estudante sira ne'ebé partisipa iha treinamentu ne'e hamutuk ema nain 30, kompostu husi mane 15 no fetu 15.

Materia iha treinamentu ne'e koalia liu kona-bá asesu ba justisa formal ne'ebé kobre asuntu direitus umanus, kódigu penál no kódigu prosesu penál ne'ebé vigor iha Timor Leste, klasifikasaun tipu krime tuir lei Timor Leste no oinsa atu asesu ba justisa formal.

“JSMP kontinua fahe informasaun ba estudante sira liu husi treinamentu ne'ebé koalia kona-bá asesu ba justisa formal. JSMP espera katak estudante sira ne'ebé nu'udar futuru ba nasaun bele kontinua habelar informasaun ba iha comunidade” dehan Luis de Oliveira Sampaio, Diretór Ezekutivu JSMP.

Vise Diretór Eskola Sekundaria Públiku Palaban, Sr. Carlos Carno Tuoto, iha ninia intervensaun husu ba estudante sira hotu ne'ebé partisipa iha treinamentu ida ne'e atu bele fo atensaun no rona ho didiak materia ne'ebé mak apresentador/fasilitador sira apresenta, tanba ne'e hanesan oportunidade espesial ba dahuluk, JSMP mai hala'o treinamentu iha Eskola Públika Palaban.

Iha tempu hanesan Vise Diretór hatutan tan katak durante tinan liman ona laiha NGO ida mak ba fo treinamentu maske haruka ona karta pedidu. Tanba ne'e, Vise Diretór apresia teb-tebes ba JSMP tanba bele oferese treinamentu ho meneira ne'ebé mak úniku tebes no halo estudante sira bele fokus ba iha materia refere.

Durante treinamentu estudante hotu pro-ativu tebes liu-liu iha sesaun diskusaun, estudante sira maioria kestiona makas kona-bá servisu Polísia Nasionál Timor Leste. Tuir sira katak dala barak polísia halo sira nia kna'ar la tuir lei no prinsípiu direitu umanus. Sira observa katak wainhira hetan problema ruma polísia mai la'os atu halo atuasaun maibé dalabarak polísia ate ba provoka fali situasaun ne'e.

Estudante sira mós fo atensaun makas kona-ba asuntu violasaun seksual. Tuir sira nia hanoin katak violasaun seksual nia numéru aumenta tanbá estadu la halo sosializasaun maximu ba lei sira ne'e too iha baze liu-liu ba estudante no comunidade sira hodi nune'e ema hotu bele hatene konsekuensia hosi krime hirak ne'e.

Treinamentu ne'e ensera ho entrega JSMP nia publikasaun hanesan *news letters* no pamfletu sira.

Atividade treinamentu ne'e realize tanba hetan suporta orsamentu husi Finlandia.

Atu hetan informasaun kle'an favor kontaktu direitamente:

Luis de Oliveira Sampaio

Diretór Ezekutivu JSMP

Diresaun e-mail: [luis@jsmp.minihub.org](mailto:luis@jsmp.minihub.org)

[info@jsmp.minihub.org](mailto:info@jsmp.minihub.org)

telefone: 3323883/77295795

webiste: [www.jsmp.tl](http://www.jsmp.tl)

facebook [www.facebook.com/timorleste.jsmp](http://www.facebook.com/timorleste.jsmp)

twitter: @JSMPtl